

■ TRIBUNA POLITICA

Grischun – pretendì dapli che mediocritad

HANSJÖRG TRACHSEL,
CUSSEGLIER GUVERNATIV

Tgi che ha success, saja quai in uman u ina interpresa, è caracterisà dal fatg d'avair la voluntad da cuntanscher dapli che la mediocritad. Latiers tutgan la prontezza da prender per mauns incumbensas pretensiusas, da cumprovar sias atgnas abilitads, da surpigliar responsabladad e da vesair en emprima lingua soluziuns pussaivlas e betg problems, l'abiltad da sa far valair, ma er da sviluppar e da realisar insatge cuminaivlamain.

Per garantir a lunga vista ina vita sociala e professiunala che pussibilitescha in'existenza en il territori da muntogna ston ins ir pli lunsch che la mediocritad. Questa schanza ha purschì la candidatura per ils Gieus olimpics d'enviern 2022. Co cuntanschain nus uss il medem senza ils effects da multiplicatur da la candidatura? Empè da perseguitar ina strategia integrada en il rom da la candidatura ston ins esser pli activ en ils singuls projects. Tant per il turissem sco er per ils ulteriurs roms da l'economia è da gronda impurtanza ina buna colliaziun da traffic cun ils centers. Ils interess da la politica da traffic dal



Grischun ston vegnir defendids en moda uschè efficzia sco pussaivel, er sch'ìl Grischun cun ses projects da traffic sa chatta en ina situaziun da concorrenza cun tals da l'aglomeraziun che han ina relevanza bler pli gronda per l'economia publica. La refurma dal turissem grischun cun la finamira principala da crear destinaziuns vegn ad esser terminada per gronda part per la fin da l'onn.

La basa per in program da turissem 2014–2021 vegn elavurada actualmain cun represchentantas e represchentants da las destinaziuns. La direcziun principala è quella d'augmentar vinavant la cumpetitivad internaziunala e da megliorar la valorisaziun dals purtaders da prestaziuns.

Tant per ils giasts sco er per la populaziun in-

digena è impurtanta ina buna infrastruttura da sport. Da vart da la confederaziun e dal chantun vegn quella promovida sur il concept per implants da sport d'impurtanza naziunala resp. chantunala. En discussiun è actualmain in center naziunal dad unihockey a Cuira, ed il chantun vegn a s'engaschar vinavant ch'in center naziunal per il sport d'enviern vegnia realisà en il Grischun. Il cussegl grond dal Grischun ha acceptà questa incumbensa d'elavurar ina strategia per sviluppar ils territoris da muntogna. Quella vegn a sa basar sin il svilup tar la confederaziun che ha – acceptond la moziun Maisson – survegnì l'incumbensa da sviluppar ina strategia coerenta per il territori da muntogna.

Ultra da las pussaivladads ch'ìl chantun ha è dumandà tut il Grischun. Valladas, interpresas e branschas ston rinforzar lur cumpetitivad e sa far valair envers la concorrenza cun products commerciali-sabels. La discussiun davart il futur ch'era vegnida lantschada cun il project «Olimpia 2022» sto vegnir continuada per dumagnar cuminaivlamain las sfidas, cun las qualas il chantun Grischun sa vesa confrontà.